



Ereintza Dantza Taldeko mutilak *Makil Handi* dantzatzen Betelun.

# Ereintza Dantza Taldea

## 2015 eta 2016 urteetan

**ANDER OIARBIDE**

Urtero legez, azken urte honetan ere Ereintza dantza taldean oinak astinduz aritu gara, bai herrian baita beste udalerrri batzuetan ere. Ezkontzak, ikuskizunak, ekintza kulturalak... Jakina da ez dugula aitzakia handirik behar dantzaz jartzeko, eta horrexegatik hemen duzue 2015-2016 bitartean egin ditugun dantzaldien laburpen bat:

**2015eko maiatza:** maiatzaren 9an Erreterian ospatu zen lehen Musikaldia jaialdian parte hartu genuen, aipagarria da arratsaldean Landarbaso abesbatzarekin batera dantzatu genuela *Donostiako hiru damatxo* kantaren bertsioa.

**2015eko ekaina:** Ekainaren 6an Gure Esku Dago egitasmoaren barnean joste egunean parte

hartu genuen *Iruten ari nuzu* kanta dantzatu. Bi aste geroago, 21ean hain zuzen ere, Anoetan egin zen ekitaldian egon ginen.

- San Juan Bezpera: Ereintza dantza taldeko dantzari guztiok dugu egun hau egutegian markatua. Urtero bezala, soka Udaletxearen arkupeetatik atera zen urteko egunik luzeenari amaiera ederra emateko asmoz. Alkateak eta Alain Mayak bidea ireki zuten eta lehenengo aldiz Erreteriarren historian, neska atzeskulari bat izan genuen, Nagore Indakoetxea, alajaina.

Ekainari agur esateko 28an Betelun izan ginen gogotsu herriaren aurrean emanaldi bat eskaintzeko.



Ereintza Dantza taldea Atlantikaldian.

### 2015eko uztaila:

- Salou: Esaera batek dio ohitura onak ez lirakeela inoiz galdu behar, horregatik urtero egin ohi dugun bezala, Salouen igaro genuen uztailako lehenengo astea; Salouko Euskadiren eguna ospatzeko eta bertan parte hartzeko asmoz.

Saloutik bueltatu ginen, baina deskantsatzeko ia astirik gabe: gure taldeko neska batzuk Kukai dantza taldearen *Kukaikaxa* lanaren estreinaldian dantzan aritu ziren.

Madalenak ia ganean genituela urtero bezala ez genuen hutsik egin Erromeria egunean, uztailaren 18an. Dena dela, aurreko egunean Madalenetako omenduek (Hibaika arraun taldeko kideak) guk ere arraun egiten bagenekielarik ikusi zuten, bada batelaren zortzikoa dantzatu genien.

Madalenen barnean ere ezin ahaztu 22 eta 25 egunetako prozesioan amabirjinari eskaini genion ezpata-dantza. Uztailari amaiera emateko, eta abuztuan hartu genuen deskantsuaren aurretik, Loiolan ikuskizuna eskaini genuen.

**2015eko iraila:** Pilak inoiz baino kargatuago genituen entseguetara bueltatu ginenean, hasi eta berehala, 17an, Atlantikaldiaren bigarren edizioa etorri zitzaigun gainera, bertan Nafarroa Behereko dantzak egin eta Kukaikaxan parte hartu genuen berriro ere Kukai Konpainiarekin batera. Igandean Andra Mari abesbatzarekin batera amaiera eman genion jaialdiari.

**2015eko urria:** Urriaren lehen asteburuan Iurretan izan ginen bertako taldearekin batera

San Migel jaiak ospatzeko gogoz. Aste-bukaera horretan bertan gure dantza taldeko dantzari diren Beñat Salegi eta Luis Garciak Euskal Herriko Aurreku txapelketan parte hartu zuten; gainera, Beñatek hirugarren postuan sailkatzea lortu zuen. Bi aste geroago Idoia Besada estreinako aritu zen Euskal Herriko Dantza Solte txapelketan bere bikote den Xabi Artolarekin batera, eta hori aski ez dela, bigarren postuan sailkatzea lortu zuten.

**2015eko azaroa:** Azaroaren bigarren astean Extremadurako astea ospatu zen eta bertan gure parte hartze aktiboa izan zen, inaugurazio ekitaldian dantzatu baikenuen. Ondorengo egunetan ere hainbat emanaldi izan genituen.

**2015eko abendua:** Santo Tomas eguna Errenterian oso egun berezia izaten da, txistorra postuak, animaliak, azoka... Herriak urte batzuk atzera egiten du eta baserritarrak baserrietatik herrira jaitsi bailiran, txapelek, blusek eta soinekoek Errenteria xarma berezi batez jantzen dute. Ereintza dantza taldeak ere bere aletxoak jarri zuen txistorra eta taloen postua jarrita.

**2016ko otsaila:** Aurten inauteriak goiz etorri zaizkigu, eta horregatik urte berriari hasiera eman eta berehala gure mozorroak prestatuta genituen.

- Azeri dantza: Errenterian jada tradizio bihurtu den ekitaldian Ereintzako sasi-mutil eta sasi-neska guztiok ohiko kalejira luzea martxan jarri genuen. Taldeko dantzariok eta festara apuntatu ziren bikoteek gure alde ganberroena aterata inauteriei hasiera ezin hobea eman genien.



EREINTZA DANTZA TALDEA

Ereintza Dantza Taldea Azeri dantzan.

Otsailari hasiera ona eman bagenion ere, ezin izan genituen nahi bezala agurtu inauteriak, ezen eguraldi txarrak sardinaren ehorzketa bertan behera uztera behartu baitzuen.

**2016ko apirila:** Udaberriaren etorrerarekin batera, urtero bezala Hernanin ospatzen den Dantzari egunean izan ginen Euskal Herriko beste talde askorekin batera; aurtengoa XXI. edizioa izan zen.

Apirilaren 21ean ETB 1en Aiko taldeak grabatutako Jotamentala proiektua telebistan estreinatu zen, non gure taldeak bere ekarpena egin zuen, preseski Sabin Bikandiren eskutik jasotako klasean eta gure taldeak dokumentalerako espresuki grabatu zuen fandangoan.

Apirilaren azkeneko asteburuan, 30ean, hain zuzen ere, Errenteriako Sagardo eguna ospatu zen eta egunari jai-giroan hasiera ematearren, Foru plazan Sagar dantza egin genuen.

Horrenbestez, atzera pixka bat begiratu ostean, ikusi duzue urte aktiboa izan dugula Ereintza dantza taldean, baina betiko poztasunarekin eta gogotsu egin dugu emanaldi, dantza eta emandako urrats bakoitza. Orain, aurrera begiratzuz eta uda datorrela eta, ekitaldi eta ikuskizun ugari datozkigu gainera, San Juan bezpera, Salou, Erromeria Eguna... eta, ohi bezala, ez dugu hutsik egingo. Gainera abuztuan Txekiar Errepublikara bidaia egingo dugu, gure kultura eta dantza bertara eroateko asmoz, baina hori beste egun batean kontatzeko kontua izango da...



EREINTZA DANTZA TALDEA

Ereintza Dantza Taldea Hernaniko XXI. Dantzari Egunean.